



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim

tiryimyim@aolima

tir yimyim

TAPAK 8

Gabon lenir inyaksü General Brice Oligui Nguema shimogo

Prithvi Shaw 2024 kuma Northamptonshire nungi asayatsü



VOL. XX NO. 320 (ADOK 320) DIMAPUR ROGONÜ (FRIDAY)

RONGJUI (SEPTEMBER) 01, 2023

₹ 5.00

Naga nunger MLA ti-i tezüluba agütsüba agi yimtenren benteter: K. Therie

Dimapur, Luroi/August 31 (TYO): Ajaki molungtepa aliba political solutions mapa kima inyaksü BJP aser NDPP ajanga memerang. Parnoki Governor menden nungi R.N. Ravi agien, kechiaser pai solution asoshi nendaka inyaka liasü, ta Nagaland indang taoba finance minister, K. Therie-i sangdong ka nung ashi. Agreement ana zülutepba sülena parnoki maneni jembishinütsü (BJP & NDPP) State Assembly nung pangzünga liasü. Anungji tang aliba sorkar tangatetba ya political solution mapa kuma inyaksüba masü, ta pai ashi. Ajistiaka Manipur nungi Naga nunger MLA ti-i Manipur Chief Minister Biren Singh bhukuma tezüluba nung agütsüba ya Naga Political ken o nung alizüing tasen ka tongtetba lir. Manipur nung

aliba Naga nungertem Manipur state nung alitsü tejangraba lir ta Nagaland MLA temi jangja metettsüla, ta K. Therie-i ashi. Iba tezüluba ya UNC aser NSCN (IM) ajanga aitsüba asenok ajaki nguogo. Parnok MLA ti ya par teyari nung shim. Parnoki magizütsü akok, saka MLA ti yagi iba tezüluba meyipa magi. Parnok ya nüburtem asoshi 'legal representatives' lir aser parnoki kechi inyaker aji sorkar matsüngdang shidak lir, ta ashi. Flag aser Constitution akhangba mechi nüburtem tamachi mekumdaüksütsüla. Framework Agreement nung molung mechitepba lira, ken o ya Ato Kilonser jenjang nung jembitsüla, kechiaser Ato Kilonser jenjang nungang temelenshi arutsü akok, ta paisa ashi.

Advisor T.N. Mannen-i central sorkar ketdangsürtem ajuru



T.N. Mannen & S.K.G. Rahate

Dimapur, Luroi/August 31 (TYO): Nagaland MLA & Advisor, Law and Justice & Land Revenue, T.N. Mannen (IAS Rtd.)-i August 31, 2023 nü S.K.G. Rahate IAS, Secretary to Government of India, Ministry of Law and Justice aser department ketdangsürtem ajuru liasü. Iba mapang parnoki Gram Nyayalayas Act 2008 den apat State nung aliba yimtsüngtem nung Customary Courts indang ki o jen terenlok atema jembia liasü. Gram Nyayalayas Act 2008 ya 2019 küm yanglu aser ibai Nagaland aser North East India nung danga tribal state tem nung amshir. Advisor-i Justice Secretary aser ketdangsürtem dang centrally sponsored scheme ama yimtsüng sasep nung Customary Court yanglutsü asoshi senotsü teyari balaka agütsütsü mepishi aser Secretary (GoI) nunga

asadangtsü langzua liasü. Nagaland atema tekeratiba nung High Court temeja ka amenoktsü asoshi Ministry dang temelaba agütsütsü paisa nenshia ashi. Advisor T.N. Mannen-isa August 29, 2023 nü New Delhi nung Ajay Tirkey IAS, Secretary, Dept. of Land Resources, Ministry of Rural Development ajuru liasü. Iba mapang Secretary aser par ketdangsürtem lia Nagaland nung 'digitalization scheme implementation' indang lemsatepa liasü. Nagaland nungi agütsüba report nung metokmeperi kar aliba indang parnoki tuteta ashi aser nüngdakra parnoki Nagaland semdanga item mapare takok ngua inyaka nung yaritsü molunga aliba shia liasü. Kasa mapang project indang tejangja jembishinüba liasü.

Nagaland nung Aadhaar Linked Birth Registration agitettsü



Nagaland nung Aadhaar Linked Birth Registration (ALBR) sentong tenzükba mapang tangokba noksa ka nung Directorate of Economics and Statistics, Govt. of Nagaland aser UIDAI nungi ketdangsürtem den iba ALBR nung tenüng zülüokertem angur.

Kohima, Luroi/August 31 (TYO): North Eastern Region (NER) nung Aadhaar Linked Birth Registration (ALBR) tenzükba state mezüngbubaji Nagaland akumer. Iba sentong yagi arishi küm 0-5 tsüngta tanur asoba Birth Registration ya Aadhaar Enrolment nung ajemdaker alitsü. Iba service ya Neidilhou Angami, Director, Directorate of Economics and Statistics, Govt. of Nagaland lia T. Mhabemo Yanthan, IAS, Commissioner, Nagaland ajanga semzüksütsü. T. Mhabemo Yanthan-i ashiba agi, kinü tanur asoba tenüng zülüokba nung ALBR yagi tongti shilem agitsü aser tanur arishi küm 0-5 tsüngta alirtem awajemtsü. Pai state sorkar

ketdangsürtem dang ALBR ya Nagaland nung aliba district ajunga nung takok ngua amshitetsü asoshi yariteptsü ayongzük aser tanur kata social welfare scheme balala nungi mezüdoktsü ashi. District ajunga nung alirtem nem tajungtiba nung iba service agütsütsü asoshi Directorate of Economics and Statistics, Nagaland, koba state asoshi Registrar for Birth and Death lir, iba department ya ALBR inyakyim amshia Child Enrolment asoshi Registrar cum Enrolment Agency ka ama UIDAI nung aniok. North Eastern Region nung ALBR amshiba state mezüngbuba akumba atema Col. Abhishek Koushik, Director, UIDAI ajanga Government of

Nagaland nem tenüngsang agüja liasü. State nung alirtem nem Aadhaar linked services agütsütsü asoshi Office of the Commissioner, Nagaland ajanga tanen makai meranga inyakba atema pai tenüngsang agütsü. UIDAI yagi state tem nem manenu teyari agüja workshop ayongzük, kishizüing tonga oa tenüng zülüoker aser Aadhaar ecosystem nung tajangzük aliba agidaksütsü asoshi tesem tezuba tonga aor. Guwahati nung aliba UIDAI indang Regional Office ajanga Office of Commissioner Nagaland den kanga junga teka amteper inyaka arur, kobna state nung Aadhaar dak sendakba inyaksangshi asoshi Nodal Department lir.

Nagaland Angh-i state nung 'proxy' tesayur tebilemstsü lemsatep

Dimapur, Luroi/August 31 (TYO): Modern Institute of Teachers Education (MITE), Kohima pur August 31, 2023 nü 11 buba Graduation Day sentong Nagaland Angh La Ganesan-i moaja liasü. Iba sentong nung Angh-i MITE graduate, shirnok tesayur kumer kaketshir nem shisaliok tajung agütsütsü teimla lir, parnok den jembitsü maangka anguba pelar ta ashi. Angh-i tarutsü nung tesayur mapa inyaksü teimla alirtem nem tenüngsang agütsü, shirnoki takok ngua courses tem renemogo. Paisa college ketdangsür, tesayur, staff, tsürabortem aser kaketshir müketa aliba nungtem teyari nung takok ngudaksüogo, ta ashi. Shisaliok ya terenlok asoshi hadir ka lir. Shidakba shisaliok ya kaket nung zülua aliba (curriculum) azüngba kija agi monguteter saka shisaluyimertem-i mangdang tajung ayutsü aser takok angutsü asoshi tashi agütsüba nung lir, ta pai ashi. Nagaland nung kaket reju indang 'general atmosphere' ya tajung aser shisaliok angazüksü jangratemsüka lir. Anungji iba den tesayur temi bendanga agütsür tajungtiba nung sayuba ajanga state nung ajaklen

terenlok alitsü, ta pai ashi. Tesayurtem-i ochishia aser akhum agüja tematiba jenjang tenzüksütsü imlar, ta Angh-i ashi. Asen state nung tebilemstsü balala aliba rongnung kaji tesayur ajakibo state tezülen oa tenzüksütsü memolunger aser ano 'proxy' tesayur tebilemstsü ya ka lir, ta Nagaland Angh La Ganesan-i ashi. Shisaliok tajung agütsütsü asoshi state indang kinük-kisang ajaklen 'trained resources' nüngdaker. Tesayur temi tang yimya tasentem indang kanga junga meteta alitsü nüngdaker, ta pai ashi. Asen state nung tesayur inyaksütsü imla alirtemi National Education Policy 2020 nung aliba ama temelenshi bener arutsüla, ta ashi. Tesayur tem ya 'modern' asütsüla aser shisaliok ya tanü asüng technology den atongtepa sayutsüla. Shisatsü ya mouse ka anemba nung angur aser tesayur kaji tesayur dang nungi tali astsüla, resources shidak bushiba nung pei sasa angazükdaksütsüla aser kaketshir den külemi shisatsü yangertsüla, ta Nagaland Angh-i iba sentong nung ashi. Tesayur kati tanen/tatem makai angazükba ajanga dang pa/la ji tesayur tetemjen ka

akumer, ta ashi. National Education Policy 2020 indang onük nung kongshia jembidang, NEP yagi 'structure' aser inyakyim tasen agütsüba kisung masü saka tesayurtem ajungmesotsü 'mechanism' agütsür, ta Angh-i ashi. Iba policy tasenba yagi tesayur-i sayuba aser tejakleni aoba nung parnoki shilem agiba asadangtetsü, ta pai ashi. Tesayur kaji kaket reju nung kisung masü saka lenla ajak nung nüngdaker aser parnoki arishi tepiyong tanen makai terenlok alitsü asoshi lenmang tajung sayur. Angh-i state nung terenlok balala ajangshia aruba indang lemsatep aser senotsü agütsüba agi dang terenlok angur masü, ta ashi. Terenlok alitsü asoshi ajaki 'environment' tajung adokdaksütsüla aser tesunep aser nüburtem tangatetba dena lir, ta pai ashi. Tanü putu tasenba nem yimya balala angazükdaksütsü aser hadir renemtsütsü tesayur mapa lir. Anungji academic certificate agizükba sülen ajaki linük yangerba tsütsü bendanga agütsür shilem agitsüla, ta Nagaland Angh-i ayongzük. (Maneni tapak 2 nung...)

Kohima Science College Freshers' Social takok ngua agiogo



61buba Kohima Science College Freshers' Social sentong nung Women Resource Development & Horticulture Minister, Salhoutuonuo Kruse-i o jembipa noksa nung angur.

Dimapur, Luroi/August 31 (TYO): August 31 nü 61buba Kohima Science College Freshers' Social kanga takok ngua agiogo.

Iba sentong nung Salhoutuonuo Kruse, Minister of Women Resource Development & Horticulture alakteta jaoker liasü.

Sentong nung o jembiba mapang Minister Kruse-i, iba nungtugu college nung azütsü maongka ngutetba atema tasenpurtem nem tenüngsang agütsü. Laisa, college terenlok asoshi Jotsoma yimtsüngi shilem tajung agiba atema parnok nema tenüngsang agüja liasü.

O jembiba mapang Minister

Kruse-i kaketshirtem dang pei anizüngzüka aliba tesem nungi atoka ayimjema bilemdangtsü ajungshi. Iba amala tebilemdangba ajanga innovation aser technology terenlok nung koda tongtibang shilem agir iba indang jembiba mapang lai temelenshi asoshi tangar dang nungi alia bilemdangtsü ya kanga tongtibang ta ashi. Minister Kruse-isa, tetsüdaktsü balala koktetyonga aotsü asoshi tebilemtsü bentettsü asoshi tasatem, rasa bilemdangba aser ken o tasaktem tezübaba kümdaktsüba sempet koda tongtibang iba indang lemsatepa liasü.

Lai, kaketshirtem dang

metetnüba tanüla ka pei mulung nung adokdaktsütsü ajungshi, kechiyong iba ya rasa bilemdangtsü aser tebilemtsütem bentettsü asoshi kanga tongtibang lir, ta ashi.

Maneni Minister-i, idea tasen asadangba mapang rasa bilemdangba ajanga koda tongtibang shilem agir iba indang jembiba den career mashi ka asoshi tebilemtsü bentettsü asoshi tasa ya kanga dang tongtibang sempet ka lir ta ashi.

Laisa, national frameworks aser renlokyonga aoba academic aser social benchmark den jangyu medema college renloka aotsü imlaja ataba lemsatepa liasü.

Principal Director Dr. Vibeitunuo den tepila sentong agi



Dimapur, Luroi/August 31 (TYO): Department of Health & Family Welfare-i ayongzüka Principal Director Dr. Vibeitunuo M. Sachu aser Dr. Tiasunep Pongener, Joint Director na den tepila sentong agiogo.

Tepila sentong ya August 31 nü DHFW Lobby nung agia liasü. Sentong nung V. Kezo Commisioner & Secretary, HFW-i shilem agi aser pai mapa

toktsüba Principal Director aser Joint Director na dang department asoshi parnok mapang bendanga agütsüba asoshi kanga pelaba lemsatepa liasü.

Tepila sentong ya Dr. E. Motsuthung Patton, Director (Health) lenisüba nung agi aser sentong agiyonga aoba mapang Principal Director tasenba Dr. Ritu Thurr, MDNHM-i mapa toktsüba ketdangsurtem nem citation aser

kuli kakettem agüja liasü.

Maneni sentong nung mapa toktsüba ketdangsurtemia o tatsütsü jembia. Tenati department kübok jenjang balala nung tenzükerterem ajungshiba den mapa inyaka aruba mapang tajangshiba balala indang lemsatepa liasü. Mapa toktsüba Principal Director Dr. Sachu-isa, ketdangsurtem aser staff tem dang department bendanga agüja tenzüksü ajungshia liasü.

Kohima nung state Level workshop ka ayongzüka agiogo



Dimapur, Luroi/August 31 (TYO): State nung benchmark disabilities aser Persons with Disabilities (PwDs) tem jangjatsü koda tongtibang iba dak sendakba nung state Level workshop ka ayongzüka agiogo.

Anogo ka agiba State level

workshop ya Health & Family Welfare Department aser Social Welfare Department den longjemer Chief Electoral Officer, Nagaland Office-i ayongzüka August 31 nü Japfu hotel, Kohima nung agiogo.

Iba workshop ya SVEEP

nung shilem ka ama CEO Nagaland Office-i ayongzüka agiogo, koba electoral roll nung PwDs tem züngoksemba aser parnok jangjaba dak sendakba nung tetsükdaktsü alibattem bentettsü aser state nung Benchmark disabilities dak

DC Mokokchung-i gari amshiba taa agütsütsü sangdong

Dimapur, Luroi/August 31 (TYO): Mokokchung Deputy commissioner (DC), Thsuvisie Poji-i sangdong ka ajanga, taküm agiba 14 buba Nagaland Legislative Assembly Election mapang Deputy commissioner aser DEO office-i sarudenba nija gari kiburtem dang parnok gari hire asüba taa September 4 nungi 25 nü tashi agütsütsü

ta metetdaktsüogo. Anungji iba dak sendakba nung ajak dang mapang inyakba anogo office mapang Deputy Commissioner & District Election Office nungi sen ya meshia agütsü asoshi metetdaktsüogo.

Gari kibur/anirtemi hire taa meshiba mapang requisition order aser duty detailment slip original sayutsü nungdaker.

Mkg dist-i Modified Food Safety on Wheels vehicle agizükogo



Dimapur, Luroi/August 31 (TYO): National Food Safety Project Scheme "Strengthening of Food Safety Ecosystem in the State" kübok Mokokchung District-i Modified Food Safety on Wheels vehicle ka Chief Medical Officer, Mokokchung office nung agizükogo.

MFSW yagi Food Safety Mokokchung Zone nem FBOs (Food Business Operators) aser consumer tem nem training

agütsüba aser awareness balala agütsüba nung teyari agütsütsü, surveillance samples testing nung teyari agütsütsü aser kanga bulua achiba chiyongtsütem mereka alia mali ibaji jangjatsü atema spot testing asoshi teyari agütsütsü.

MFSW nung storage aser lab keta lir aser iba den technical equipment tem nem tashi agütsütsü asoshi portable power supply ka densema lir.

Nagaland Angh-i state...

(TAPAK 1 NUNGI...)

Kasa sentong nungsa Chairperson, Modern Society, Kaisa Mao; Principal, MITE, Kate Dandesh Kumar; Managing Director, Pelee Hekha aser Managing Board züngsemtem aser college indang tesayurtem lia Nagaland Angh-i NU rank holders nem kulizüng kaket agüja liasü.

Principal, MITE, Dr. Kate Dandesh Kumar-i iba sentong nung tarur pela agizükba o jembia liasü.

Sentong nung Diezelhou Sothu'er teloki temeja ken ka aten, Pukumla'er teloki sobaliba tsüngsang ka agi shilem agi aser Lemnyei M Walim ajanga Tsüngrem temoatsü kazüka sarasadem.

Iba sentong nung Arrnganla Imsong menden liasü, Shemyung E Phom, NU 2nd Rank holder 2021-23 ajanga salem o ashi aser Dr. T.S. Pandian-i melepzüng o jembiba sülen A. Tahmao Beham-i sarasadema sentong tembang.

sendakba nung tangazükba agütsütsü nükjidong nung ayongzüka agiogo.

Workshop ayongzüka agiba nükjidong tongtibangtibi, iba onük tongtibang ya sensak asemstü aser ajaki shilem agitetba aser shilem agütsü akokba election ka asoshi longjemer inyaksü atema Department asem nem ya sabang ka agütsütsü asoshi lir.


Sentong nung State Commissioner for Persons with Disabilities Diethono Nakhro alakteta jaoker liasü. Iba sentong ya Sharon Longchari, Jt. CEO, Nagaland lenisüba nung agia liasü.

Sentong nungsa Ruokuovituo

Khezhe, CEO (O)-i okila jembia aser Dr. Chekroshuyi Tetseo, Director (Dental) DHFW aser Bodeno S. Colo, Addl. Secretary, Social Welfare Dept natia o tatsütsü jembia liasü.

Workshop nung shisalen sayurtem rongnung Awa Lorin, Joint CEO, Apila Sangtam, State Counsel, Social Welfare Dept. aser Dr. Nitovi Shikhu, Deputy Director (Nodal Officer, Disability) Health & Family Welfare Dept nunger densema liasü.

Iba sentong nung district balala nungi Health & Family Welfare Department aser Social Welfare Department indang district level ketdangsurtemi shilem agia liasü.



Transforming Urban Landscape 2014-2023

August 31, 2023 nü New Delhi nung osangbenertem senden ka nung Housing & Urban Affairs Union Minister, Hardeep Singh Puri aser Ministry of Housing & Urban Affairs Secretary Manoj Joshi (ajichi) nati Ministry-i inyakba project balala indang e-book sayatsü dang tangokba noksa nung angur.

Centre sorkari 'One Nation, One Election' bill benoktsüa akok

New Delhi, August 31 (Agencies): Centre sorkari September 18 nungi September 22 tashi Parliament senden temeja ka ayongzükogo. Osang angazükba agi, taruba ita Parliament temeja senden nungji sorkari "One Nation, One Election" bill densema tongtibang bill kar benoktsüa akok. Tang tashi nungbo Parliament senden nung benoktsü bill dak sendakba official sangdong kecha memetdaksü. Brihostibarnü Parliamentary affairs minister, Pralhad Joshi-i twitter ajanga, sorkar mapatong Amrit Kaal atema akhüm agütsütsü atema senden ka ayongzüktsü, ta metetdaksü. Joshi-i X (taoba mapang Twitter) ajanga, "Parliament senden temeja ka (17buba Lok Sabha nung 13buba session aser aser Rajya Sabha 261buba session) September 18 nungi 22 tashi ayonger aser senden pongu alitsü. Amrit Kaal mapang nung Parliament nung o junga lemteptsü aser tokteptsü yongyar," ta metetdaksü. Yimtenren party balalai taküm küm tatembanglen state pongu nung assembly elections atema renemshiba mapang nung Parliament temeja senden ayongzükter.

Jammu & Kashmir nung election agitsü renema dang lir: Centre

New Delhi, Luroi/August 31 (Agencies): Brihostibarnü Supreme Court nung ken o ka angadanga mapang nung Centre sorkari, Jammu & Kashmir nung mashie mapang ka nung election agitsü renema dang lir, ta metetdaksüogo. Sorkar tenüng nung jembir Solicitor General, Tushar Mehta-i Supreme Court dang, Jammu & Kashmir nung voters list maparen tembangogo, ta metetdaksü. Mehta-i, Jammu & Kashmir nung Panchayat aser municipal elections agiba sülen legislative assembly elections agitsü, ajisüaka election agitsüji State Election Commission aser Central Election Commission-i sangdongtsü, ta metetdaksü. Jammu & Kashmir nung Arlla 370 agienba anema benokba ken o angadanga mapang Mongolbarnü Tushar Mehta-i Supreme Court constitution bench dang, J&K nem state jenjang agütsütsü aser iba atema mapang tatakzük osangji Brihostibarnü metetdaksütsü, ta shia liasü. Chief Justice Of India, DY Chandrachud-i aniba bench-i Jammu & Kashmir nung democracy nüngdakba nung rangloker ken o angadanga arudar. 2018 küm June ita nungi Jammu & Kashmir nung nüburtemi shimtetba sorkar mali. Chief Justice-i, linük security dak sendakba tebilemstüjia tongtibang, ajisüaka iba region nung democracy tanaben agütsütsüji kanga nüngdak, ta metetdaksü. Centre tenüng nung attorney general aser solicitor general den senior lawyers kari Supreme Court nung Centre pusema jembidar. Ano külen senior advocates- Kapil Sibal, Gopal Subramaniam aser Rajeev Dhavan nungeri temepishiba ken o agütsürtem pusema jembidar. Solicitor General-i, Ladakh yabo maneni Union Territory dang asütsü, ta ashibaji Ladakh region nung lenirtemi ashishidar. 2019 küm August ita nung Centre sorkari Jammu & Kashmir nung Arlla 370 agienba sülen union territory ana tentetja liasü. Ajisüaka Centre sorkari mapang tetemsü nung J&K nem tanaben state jenjang agütsütsü, ta nangzükba liasü. Mapang shia Union Home Minister, Amit Shah-i Jammu & Kashmir nem tanaben state jenjang agütsütsü, ta jembir ajisüaka mapang tatakzük memetdaksü.

Democracy kümzüktsü atema opposition longjemmer: INDIA

Mumbai, Luroi/August 31 (Agencies): Brihostibarnü Jammu & Kashmir Chief Minister, Mehbooba Mufti-i, Opposition INDIA teloktep nungi lenirtemi, "Linük temzüng aser democracy kümzüktsü atema onok longjemogo aser onoki common program ka renemtsü," ta metetdaksü. Anogo ananü Indian National Developmental Inclusive Alliance (INDIA) senden ya Mumbai nung aliba Grand Hyatt hotel nung ayongzükba agir. RJD lenir aser taoba mapang Bihar chief minister, Lalu Prasad Yadav-i, tang mapang ya linük telongjem aser nüchiso tashi itdaksütsü mapang lir; linük temzüng aser democracy kümzüktsü mapang lir, ta metetdaksü. Lalu Prasad-i, "Modi sorkari sensak tia, mapa manguba tebilemstü aser aluyimertem tebilemstü onüktem atema meinyakteter. INDIA teloktep senden nung onoki common minimum program ka renemtsü. Onoki longjemmer tokteptsü," ta metetdaksü. Mumbai nung osangbenertem den jembidang PDP lenir aser taoba mapang Jammu & Kashmir Chief Minister, Mehbooba Mufti-i, "Lanurtem ya linük indang tashi lir. Jawaharlal Nehru nungi tenzüka Manmohan Singh ama lenirtemi lanurtem dang lenmang sayutsü atema inyak aser JNU, IIMs, ISRO ama reju balala amenoktsü," ta metetdaksü. Aam Aadmi Party lenir, Raghav Chadha-i, "BJP-i INDIA teloktep tsübur. Parnoki INDIA olong semper aser iba nüngja ya kiralongrar telok ka den sendakteptsür. Iba ya tesempa dang masü saka, teloktep yagi takok angu nungbo koda, ta tsübur," ta metetdaksü. Shiv Sena (UBT) lenir, Aaditya Thackeray-i, "INDIA teloktep nung lenirtemi linük nung democracy aser temzüng kümzüktsü atema longjemogo," ta metetdaksü. RJD lenir, Manoj Jha-i, INDIA teloktepi linük longjemdaksütsü atema inyaker, ta ashi. CPM general secretary, Sitaram Yechury-i, nüburtemi INDIA teloktep pelaa agizükba ajanga Ato kilonser aser BJP tsübur, ta ashi.



August 31, 2023 nü Ghaziabad nung aliba court ka nung advocate ka khasetba ken o nung tai tonglokja alir ana police-i puer aoba noksa nung angur.

EAM Jaishankar-i North Macedonia Foreign Affairs Minister ajuru

New Delhi, August 31 (Agencies): Brihostibarnü New Delhi nung External Affairs Minister (EAM), S Jaishankar-i North Macedonia Foreign Affairs Minister, Bujar Osmin ajuruogo. Anepdang linük tatong Tir, Jagdeep Dhankhar-ia Bujar ajuruua linük ana tsüngda tesendaktep junga aliba atema jembia liasü. Tatong Tir indang twitter official account ajanga, "Tanü pai, Bujar Osmani, North Macedonia Minister of Foreign Affairs-i Upa-Rashtrapati Nivas nung tatong tir Jagdeep Dhankhar ajuruogo," ta metetdaksü. "Akhidang nungi tesendaktep yangluba sülen India aser North Macedonia na tsüngda tesendaktep junga aliba aser linük ana nungi nüburtem tsüngda sobaliba tsütsü tesendaktep junga aliba atema jembio," ta kasa tweet ajanga metetdaksü. Anogo asemnü India semdangtsü atema Brihostibarnü North Macedonia Foreign Minister New Delhi tonga aru. Hokolbarnü Osmani-i Kolkata semdanga yangji sentong ka nung adentsü aser Honibarnü India nungi meyipa aotsü. July ita nung Minister of State for External Affairs, Meenakshi Lekhi-ia North Macedonia semdanga liasü. July 10-11 anogotem nung Macedonia semdangba mapang nung Lekhi-i Ministry of Foreign Affairs aser Ministry of Culture nungi tongti ketdangsertem den linük ana tsüngda lenla balala nung tesendaktep atema jembia liasü. Laisa Assembly Speaker ajuru aser Skopje nung India nunger ajuruua liasü.



August 31, 2023 nü Brazil Army General, Tomas Miguel Mine Ribeiro Paiva-i Pokhran Field Firing Ranges semdangba mapang Indian Army tem den tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, RONGJUI (SEPTEMBER) 01, 2023

Tatidang ajanga dang mapa angutsü

Nagaland state nung pi tsüngdang nümamedangtetsüsa tezüdangtsü mapa aika liaka, tang state government-i teti asoshi state atema tajung ka inyakbaji, Nagaland Public Service Commission (NPSC) küboki maitba mapa tilatem nung inyaknertem shimtsü atema tatidang agitsü asoshi Nagaland Staff Selection Board (NSSB) shimba mapa ya asütsü. NPSC ajanga tatidang agir shimba mapatem yabo government nung tashi aketba tulur menden nung amentsü atema dang shimer, anungji tanüngba mapatem kobasa 'Group C' küboki aiter, item mapa tilatem yabo NSSB meshim tashibo yimten yimsüsür aser ketdangsertemi pei shimnüsü dang shima aru. Item dangji tezülen (backdoor) nungi shimertem ta ajar. Aji oda, nisungi pei shimnüsü shimer asünungji, mapa meteta ali mali kecha metendangi dang, kar kinunger aser temetteper apia, kar election nung yariba melen, karbo onsara meimtepba agi, karbo sübokrem agütsüba agi aser ano karbo onsara junga sarasademtsüba agi ta department shia nung mapa dang nungibo inyakerkemang teimba shima aruogo. Atangji, tatidang magii mapai aiertemji tia ajung ta südi, saka Nagaland-bo tia majung, kechiyong iba jagi tanü tashi Nagaland-bo inyakyim aika nung timtemdagi, kechiyong mapa inyak mashi ser mapa nung shimokba inyakerkem aika inyaka-inyaka küm agi tonger tulurbo akümer saka mapa mashi nungji department asoshi nungdak madoker ta nübertem akoksadaksüba limaji Nagaland lir. Aji oda, type ajen mashi ser typist shimer, computer amshi mashi ser computer assistant shimer, technical mazüng ser technical mapa nung shimer, kecha mesayutetsüba nisung ka tesayur shimer ta gari anishi mashi ser driver shim ama, Nagaland government nung inyakerkem shimba ya mashimashika inyaka talangka aruogo. Iba jagi tanü government office nung mapa maka kar office-i maor aser aoertemjia mapa maka moktepa kazür ta angutsü. Aji, mapa makaba agi masü saka mapa inyak mashiba ajanga lir. Aji oda, asenoki asenok akoksatsüsa inyakba mapa kaji election nung pei vote sen yong dang masü saka government mapayong ayokba lir. Ano nisung karbo sen-a meshi aser government mapaa meshi aser tesüsabo mepelatepi senshi ta asüba purtema lir. Item backdoor inyakyim jagi lanurtem rongnung junga zünga shia meteter tajungertem aika akoksadaksüogo aser ochishia inyaknertem aika tezüdangdaksür. Item tim masüba inyakyimtem ajak kokteta Naga nunger kaketshir aser lanurtemi aginüba ama, Nagaland government-i tang nungibo government mapa tilateri ajak NSSB ajanga tatidang agir dang shimtsü telemtetba agir mapa küma inyakba ya, Nagaland tasen küma tenzükshiba mapa ka asütsü. Tanü putu yabo tajungertem putu dang masü saka tajungertem rongnunga tajungtiba purtem putu lir, kechiyong tajungtiba purtema aika adoker, anungji tajungtiba purtem rongnunga mezüngpurtemang shimer. Iba ama putu ka nung asenokbo sübokrem agi government mapa tilaka alitsü merangtsü na? Mesüra Laishiba amer tatidang magütsüi government mapa angutsü atema sarasadema jajatsü na? Tangar pei lima aser nübertem asoshi taküm bendanga agüja inyakdang asenokbo government mapa ka atema asen vote aser asen senso temeten aser asen akhüm ayoktsü na? Joko, tatidang magiibo Nagaland nunga government mapa kecha mangutsü, kechiyong tatidang ajanga dang lanurtem rongnunga tajungba purtem shimteta agitsü sentong tenzükogo. Iba mezüng sentong nung NSSB ajanga tatidang kanga junga agir government mapa tapu balala 587 nung nisung shitak shimer mapa agütsütetbaji Nagaland asoshi osang tajung ka lir. Iba kasa mulunglemtet jenjang nung NPSC aser NSSB na prongla maneni inyaka aotsü imlar. Atangji, pei shimnüsü shima liasüba, iba tashiji peisasa agiener tatidang ajanga pi nem shimdaksütsü lemtetbaji, koba government südirsüaka, government nung alirtemi tang aser tarutsü Nagaland ajungtsü atema agütsüba tenla tuluka asütsü, anungji parnok tenünga asangtsü tim.

OLEMSABANG

YIMTSÜNG NUNG ALIR DANG NUNGI BENDANGLÉN ALIR SHISATSÜ TAKABA ASÜ ?

~ Süpongñüsang Longkümer,
Darogapathar Dimapur

Kü tangatettba aser tebilemba kar lemsatepnür, mapa medenni otsü maka aser otsü medenni ken maka ken ya office file mesük anungji tsüraportemi otsü ka jembidang ken ka tena mesayura otsüji memedendaksü tetezü kuli agütsür mali; office file maka ama otsüji tiyazü kümdaksü.. Englishi ken aika akabajia tatalokba aser tataloktsü aliba agi ken yagi arütsür, ajungshir, aser menungra bilemtetdaksür ta bilema liti. Yimtsüng yimsüsürtem ken o ajak metetta tatsü talang ajak metetter yimsü asür, saka bendanglen alirtem bei yimtsüngi oa o lemtep aka dang yimsüsüri nenok bendang lima alirtemji tetsüng tentter, tashikang tentettertem onok nem yimtsüng nüka yutsür yimtetta aorji nenoki shisa tajung agüjangma ta oki alaba angashidang tanganütsüka angashir, saka yimsüsüri subaliparen kinük pezüsülen nungi jembidang teshinütsü otem ama adoker, ya kechiba ta bilemdangra nüpur anüktsü Tsüngremi shimtetsüba taküm aser kibong lir anungji tsüngremi arüshia dokjangma ta sarasatemer. Bendanglen alir dak yimlabaji arogo ka nung Sannüker kaji tain-a sang tanur-a sang tazüngba tulu nüpur atema Tsüngrem shisatsü shidak angazüktsü shimmer. Yamaji bendanglen alirtemji tapu tanak ajak ten lisümbabur asünungji yimtsüngi shisatsü tarok talang aginür aser yimlar. Air asangurtem bei yimtsüng nung shisatsü aser lipaliru janratema mangazüker anungji Mokokchung nung azüngtsü aor yamaji Mokokchung nung azüngertem Kohima Dimapur pauhia senshir. Kohima Dimapur nung alirtem ano Assam Shillong India aser atetta shisatsü aser mapa pushia prokshir. Anungji yimtsüng alirtemi bendang alirtemji LENJETTER ama repranger aser yimlar. India aser atetta oa alirtem yimtung nung jajatang Car nung süshia tetsüng agi jajaka yimtung nung chiyongtsü alia chira iba alepbangba mica, papertemji bei kidangi benür oa dust pen nung indoker masüra rongdoker anungji kima yimtung ajak temerük aser tülemsa angur. Bendanglen alirtemi nai kechi ajangshi yimya süshia mapa inyakyim süshia bei nüpur yaritetsüsa bilema ali nungpo kanga jungdisü ta bilemer. Kohima aser Mokokchung nung jajatang aikati tsünglu taru majung mentsü (Latrine) kilentzü nung mesüoktsüba ajurur aser iba jagi bei sasa bei mimer ta mangatetter. Mica aser süjen bei kidang mesüra atsü nung rongdoktsüba ajak yimtung nung aser kilentzü nung mesangshiba agi tashidak tali adoker alima raksar terprangtsü nung tejakleni aoba mesayur ta angatetter.

Yimtsüng nung alirtem, Tsürapor mapang ango chinüra kidang tzü muludaka yutsür aritepba ayongi oa moti ka dangzüka sepdoker Akong aser zür poa penür adoka sua chiyonga mesüra ozü she chinüra wanglet mekadaka yutsüba ata lia sazüka penür adoka sua tali shizüka lia aru. Tanüpo nüri kilentzü nung mentsü anioktsüba aser jana Mica aser süjen agi ayong tang masü meta ajak temukongtsüka mesangshiba agi shiba aser shir mimer. Iba dangi litetter ta masü lirepber ta ajar masüno ta sasatetter. Latrine Tank ya koma aroka yanglutir yangluaka tiyong dakdang nung kiküm tu Lenten nung 3ft aser tasa nung 2 1/2ft aser tzü temerük yimdok dak 4x4 ft aser tarok yanglur tamshi tenzük dang mezüngpuba nung tzü agi Tankyji süngdaksür amshira küm 30- 35 tashipo kecha shisa mepulue ayongayonga amshir. Kechaser tzü melira scüji ashir aser aji mesenia machir aser zükdena ayuba jagi tankyji melemela asünger tzü jagi süngdaksür amshira mesen scü tila tsükba jagi tankyji küm aika nunga masünger. Latrine nung ken amendang nisung kati tzüji Jog ana mesüra asem agi peria akir anungji tzü jagi ali 2ft memetenrar anungji züpazüpa mesüe senotsü kasa tang aotsü asünung bilemdanga asenok talitsü satema akümstsü inyak nungpo jungla ta angatetter.

Bendang lima alirtem tashi tawartem aser taka taiter ajaki bei yimtsüng meima shisatsü nung aser temetettba ajak agi yimer yimsanger- i kechi janrar bei janraba nung yaritep nungpo aser yimtsüngji Town ama lemsa lemsa renlokaksü nungpo kanga jungtisü. Item ajak tashi temetetter tiyari ajanga inyaksü mesüra yimdaklir kija agi mapang tang atsülangtsü südi ta ni angatetba nung lemsatepber.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Khristan film 'Ordinary Angels' indang trailer tasen ka sayaogo



August 31, 2023: 'Jesus Revolution' film yanglurtemi Khristan film tasen, 'Ordinary Angels' taküm October ita nung sayatsü lia iba film trailer tanabuba sayaogo.

'Ordinary Angels' film trailer tanabuba ajanga meimchirtem tsüngda tesendaktep aser nisung kati mapa tajung tilaka dang inyakyonga ibaji ajanga tangar ka taküm nung tuluka kongshiba sayar.

'Ordinary Angels' film ya taküm October 13 nü theatre nung sayatsü. Film otsü nungji kou anepalutsür (hairdresser) kati sangremer ka yaritsü atema nüburttem ajungshir, aser ibaji

ajanga sangremersang'er jala ka shirang anepa taküm kümzüiker.

Lionsgate-i sayaba Ordinary Angels film nung tongti shilem agir anaji Alan Ritchson (Reacher, The Hunger Games: Catching Fire) aser anaben tashi Oscar award angur, Hilary Swank (Million Dollar Baby, Logan Lucky) na lir.

Film tasenba ya Jon Gunn-i direct asü aser Producer temji Kevin Downes, Jon Erwin aser Andrew Erwin nung lir.

Jon Gunn-i, "Sharon Stevens aser Schmitt'er kibong otsü ajanga, asenoki tangar yariba ajanga asenok sasa asen taneptsü anguba asenok nem

nenshia metetdaksür. Tang alima den lemsateptsü osang tajungtibaji ibaji asütsü," ta metetdakja liasü.

Swank-i, "Iba film ajanga asenok dang, kodak tenyartemji tesem ajaklen asenok rongnung densema lir, ta asenok nem nenshia metetdaksür. Iba denji külemi tamang, teimla, tasü-aitba aser tajung bilembaji sayatenya atema totzü lir," ta ashi.

"Iba otsü ya temang shilem tenlaba nung tashi tulu keta aliba otsü ka lir. Iba otsü aser osang sangdongba nung shilem agitsüsa maangka anguba atema ni kanga pelar," ta Swank-i ashi.

Kaduna state nung Khristan ana apu aser Baptist pastor ka tepset

Abuja (Nigeria), August 31 (Agencies): Nigeria kübok Kaduna state nung kiralongrar anati Baptist Arogo nung pastor ka tepsetba sülen anogo ana dang lir Hokolbarnü (August 25) kiralongrartemisa Khristan ana puer ao.

Kiralongrartemi Wusasa yim amakba sülen Khristan adianu ana- Yusha'u Peter aser Joshua Peter na puer ao. Tenaprongla St. Luke's Anglican Hospital nung inyaker.

Osangbener den jembidang Khristan kati, "Adianu ana tebu-a tamalen kiralongrartemi puer oa liasü. Mapang shia kiralongrartemi iba tesem amaker aser Khristantem puer

aoer. Tawa kiralongrartemi yimdak Khristan anata tepsetogo," ta metetdaksü.

Chikun County kübok Kujama nung aliba Tawaliu Baptist Arogo nung pastor, Rev. Jeremiah Mayau August 23 nü khaset.

"Rev. Jeremiah Mayau par alu nung mapa inyakba mapang nung kiralongrartemi khaset," ta Matthew Audu-i metetdaksü.

Christian Association of Nigeria (CAN), Kaduna State Chapter nung Chairman, Rev. Joseph John Hayab-i, "Kiralongrartemji Kaduna state kübok Chikun Local Government Area-i aruba sülen Kujama nung aliba Tawaliu

Baptist Church nung pastor, Rev. Jeremiah Mayau alu nung lia khaset," ta metetdaksü.

Paisa security agency tem dang Kaduna state nung ozüing alema inyakba mapatem nokdangtsü mepishi. "Prangpong amer telok balala anüngdang-a sademsadema senzür aser temenen mapatem inyaker, ajüsüaka parnok anema kecha meinyaker. Loktiliba nung ozüing alema inyakba nokdangtsü atema ketdangsertem shima lir, saka parnoki item mapatem menokdangteter," ta pai ashi.

August nüa Kujama kübok Ungwan Rana nung kiralongrartemi Khristan tetsür ka mejanga lia tepseta liasü.

Kiralongrartemi Congo nung Tenla ki amakdang Khristan aika tepset

August 31, 2023: Taoba Amongnü Congo kübok Ituri province nung kiralongrartemi Tenla kidang tamangertem amakdang Khristan aika tepsetogo, ta ketdangser kati metetdaksü.

Cooperative for the Development of the Congo (CODECO) teloki Tenla kiji amak, ta Djugu territory administrator, Ruphin Mapela aser lokti lenir, Dieudonne Lossa nati metetdaksü. Iba tatalokba nung Khristan

9, kiralongrar pezü aser sepai ka (ajak agi 14) asü, ta tenatisa metetdaksü.

Cooperative for the Development of the Congo telok yagi Lendu aluyimertem pusemer. Mapang talangka nungi Lendu aluyimertem aser kiset shiruru mesür Hema nung na tsüngda rarar.

Tang Congo kübok Ituri province nung nisung million 3 dak temai teyari balala nüngdaka timtemer; ano külen CODECO-i mapang shia

timtem agütsür.

Taküm March ita nunga Congo kübok Nord Kivu nung Islamic kiralongrar telok-Allied Democratic Forces (ADF)-i Khristan 72 tepseta liasü.

Butemboji nung Arogo lenir, Mulinde Esem-i, "Anüdoklen DRC kübok jila aser yimsüngtem naprongla nung tensa kanga mejungi lir. Anogo shia nüburttem tetsübu nung dang alir. ADF teloki tamangertem aika shiruru amai dang tepseter," ta pai ashi.

ANOGO ABEN TSÜNGREM DEN

Tepela nung ruang

T.Ken 126:1-6

Asenok ajak metsü proker ka ka lir ta metetang. Tanü asen ajaki metsü proker aser aji arutsü. Kari shi nung proker. Pauli Galatia 6:8 nung kari shi nung proker aser ibaji teraksa arutsü. Kari adianu rongnung telemsa proker. Kari tiyazü proker. T.Ken 126 nung kechi proker kümdanga proktsü indang ashir, kechiaser asenoki prokba asenoki arutsü.

Ken züluri ashibaji raprangang: "Shirnoki nüktzü yima proker, tepela nung arutsü. Shirnoki teproksü metsü bener jeba aor; pa tanaben tepela agi, pa den tsükpung bener arutsü" (t.5,6). Tsüngremer nübun metsü prokdang jeba proker, saka parnoki tepela nung arutsü. Khristan ka ama nai mapa tajung ajanga, ochi aser temeim ajanga Tsüngrem oji proker. Nai metsüji aremer aser Tanela süngjang temeim, tepela, yimjung, tesünep, taremsük, tamang katetba, pei sasa azüokba adokdaksür.

Takümüji aiben timtema alir, iba jagi asenok nüktzü yimdaksütsü akok, saka tepela nung arutsü. Mamangertem yamaji masü. Tamajung telok aor aser pelatepa proker. Parnoki mapang tajung agir. Saka kodang aluruba arur, parnoki tejashi arutsü.

Asen ajaki telemtetba ka agitsüla: Nai tang jangratemji aginer asü mesüra Tanela Temeshi aluruba ataa alir? "Tekülakokdaksü; Tsüngrem mezüngmeshi masür. Kechiyong kechisa nisungi prokdir ajisa pai arutsü" (Gal. 6:7). Asen mapa nungi adokba asenoki agitsübaji Tsüngremi mulungba lir. Aseni prokba nung tetemlok asenoki arutsü, kechiaser metsüjang kija masür; renloker.

Na tanü temenen tepela asoshi lira, aluruba jagi tajepba bener arutsü. Saka na tanü Tsüngremi mulungba nung lira, alurubaji tepela nung alitsü. Na aser tangar asoshi Tsüngrem metsü; tepela metsü aremtsü Tsüngrem teyari asüngdangang.

Pope Francis-i Mongolia linük semdang



Vatican, August 31 China shilem ka liasü.

(Agencies): Brihostibarnü Pope Francis Mongolia linüki apusoa ogo; Buddhist nütsüing teimba aliba linük nung ya Khristan 1,450 shi dang lir.

Mongolia aser China na tsüngda tesendaktep tajungba kümdaksütsü nükjidong nung Pope-i Mongolia semdang.

Brihostibar (August 31) nikongdang 6:30 ako nung ITA Airways tayimtsü ka nung Pope den pa meinertem Rome nungi apusoa ogo.

Francis-i China adena aoba mapang nung China Tir den osang ka lemsatepba den külemi China atema sarasademtsüogo. 1921 küm tashi Mongolia ya

Honibarnü arrshi küm 86 Francis-i sorkar lenirtem aser ketdangsertem den jembitsü.

"Pope-i iba linük semdangba ajanga alima dang, tanü putu nung Mongolia-i maneni tamangba yimsü temeden aser ajak tesünep nung aliba agizüker, ta sayur," ta Ambassador to Vatican, Gerelmaa Davaasuren-i metetdaksü.

Amongnü yimsü balala nungi lenirtem senden nung Pope adentsü. Bodhbarnü Francis-i sangdong ka ajanga, alima tzü-mopung kümzüksü atema pai Mongolia nung document tasen ka sayatsü, ta metetdakja liasü.

**AO OSHI ANGAZÜKDAK:
TANÜ ANGAZÜKTSÜBA OJANG**



Sa

(suffix) kechisüdirsiüaka inyaksü mesüra ataloktsü ta metenloka ashiba (must be)

* Joko lemtetadokerji *inyaktsüba*.

Saak

(v) mejangba nungi shilang, shishi (wake up/ awake)

* Mapa aika aliba agi ni anepdang yakta *saak*.

OLONG PAITEP # 6622

1		2		3		4	5			
				6						7
		8								
9				10		11				
			12						13	
						14				
16						17				

TIPLÉN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S_ _ _ i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenuk telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 6621 TELANGZÜBA

TIPLÉN :

- 1. Tanga, 6. Wara, 7. Rajang,
- 9. Anük, 10. Jenjang,
- 11. Alar, 14. Ngashi, 15. Nala,
- 16. Mechi.

LANGTSÜNGLEN :

- 2. Anga, 3. Yabang, 4. Tarok,
- 5. Orak, 8. Ainer,
- 9. Anema, 10. Jabili,



2023 AUGUST ITA LILI RESULT !

August ita nung Lili tajungtiba (First) shimteta tanü yangi lephsia agütsür. Lili zülur-i September 10, 2023 tashi nung Tir Yimyim Office nungi senpet agizüksü mepishia metetdaksür.

PASTOR KATI KANGKI TILALA

YANGLUTENA YUR SENTEP

TEMER ALEMÉR :

Pastor : Asen arogo nung Deacon board kanga shisa kaa rongsen jenti lalua Kangki tila aika nenok sentepi arur ajak ataa yanglua lir, iba inyakyim nükjitungji iba Kangki ya apu-ani koba taktang nung tali ratateper, idakji ayutsü, kodang rarapangsen tenzükdir iba Kangki dak rangloktsü aser idangji Yisui repranger ama pilema nena rara anentsü, anungji nenok ajak kaka meshiang.

Warakla : Pastorba, nibo pungu nüngdakja no.

- Lilir : WhatsApp

Manipur nung grenade 8 densema bomb ishika ngutet



Imphal, Luroi/August 31

(Agencies): Manipur kübok lenden nung aliba district tem nung taoba gonda 24 tsüngda meita aoba sentong balala ayongzüka agiba mapang grenade 8 aser launcher rifle grenade 3 densema tapoktsü 11, pistol ka aser tanga hadir balala ngutetogo.

Iba osang ya defence wing-i Bodhbarnü sangdong ka ajanga

metetdaksü.

Itangitertem nungi osang tejangja angazükba sülen Assam Rifles aser Manipur Police na senteper Thoubal district kübok Kamu Ridge temeket nung August 29 nü meita aoba mapang item hadirtem nguteta liasü.

Meita aoba mapang iba team yagi prangbong injang aser hadir balala nguteta liasü, kong

9mm pistol ka grenade 8, radio set ka, injang aser tanga hadir balala densema lir.

Tanga meita aoba sentong ka nung Assam Rifles aser Manipur Police na senteper Thoubal district kübok Nongpok Sekmai tesem temeket nung launcher rifle grenade asem aser injang ishika nguteta liasü, ta kasa sangdong ajanga metetdaksü.

Arunachal MLA kati PM dang map ken o benoka sensak asemtsü mepeshi

Itanagar, Luroi/August 31

(Agencies): Arunachal Pradesh nung Congress MLA Ninong Ering-i Ato Kilonser Narendra Modi dang taruba ita New Delhi nung G20 Summit amenba mapang China tir Xi Jinping den China indang map nung Arunachal Pradesh aser Aksai Chin ya parnok indang litsü ama sayuba ken o benoka sensaksemtsü mepeshia metetdaksüiogo.

Ering shiba Arunachal Pradesh Assembly nung Pasighat West constituency nungi lir paisa, China-i taoba mapanga Arunachal nung tesem kar parnok meyong ta sangdongogo, ta ashi.

"China-i asa iba jenjang agiba ajanga Arunachal Pradesh nung aliba nüburttem kanga mepelar.

"China-i taoba mapanga 2023

April ita Arunachal Pradesh nung tesem 11 nüngja melentsü, 2021 küm tesem 15 nüngja melentsü aser 2017 küm tesem 6 nüngja melenja item tesemtem parnok meyong ya ashitsü merangba ajaki meteta lir," ta Ering-i Modi dangi züluba shiti nung shia lir.

Hombarnü China-i parnok indang "standard map" 2023 edition saya liasü, kong Arunachal Pradesh aser Aksai Chin ya parnok meyong ama sayua lir.

"Arunachal Pradesh kübok Pasighat West menden nungi MLA ka ama ni nü dang taruba G20 Summit nung China tir Xi Jinping den China-i parnok mulungka nung map melenshiba indang ken o benoka sensak asemtsü mepeshir," ta Ering-i shiti nung shia lir.

Ajisüka Jinping iba senden nung shilem agitsü magitsü mejangja, koba September 8 nungi 10 tashi agitsü lir.

China-i parnok indang map nung Arunachal Pradesh aser Aksai Chin inoker sayaba anema India-i Mogolbarnü ola adokogo aser ashiba agi, iba amala jenjang agiba ajanga arrtsü nung mangatettep aliba tali tebenjaba kümdaktsütsü.

External Affairs Ministry-ia, iba ken o aitsüiogo aser iba ya tamendakdak kecha mali ta shiogo.

Iba dak sendakba nung China-i parnok jenjang jangjashija, iba inyakyim ya temzüng ozüing dak ajemdaker inyakyim ka lir aser India dang ken o tali mora meyoktsü asoshi azüzüka inyaksangshitsü mepeshia metetdaksüiogo.

Manipur: Aluyimer ka dak akhaba atema nisung ka puogo

Imphal, Luroi/August 31

(Agencies): Manipur Chief Minister N Biren Singh-i ashiba agi, Bishnupur aser Churachandpur na arrtsü nung Mongolbarnü Naransena canal temeket nung aluyimer ka dak injang khalokja yirutsüba atema nisung ka puogo.

Chief Minister-isa, iba lendong atalokba sülen nikongtsütsü security forces aser police na longjemer meita aoba

mapang iba nisungba ya pua liasü. Pa ya security indang sobotsü semer liasü aser pai 303 rifle ka bener liasü.

Aluyimersang ya arishi küm 39 tain Salam Jotin ta jangaogo. Pa alu nung mapa inyaka aliba mapang tapu nung khaloktsü. Pa tang Imphal kübok Raj Medicity mozüik nung temang anepaludar.

Chief Minister N Biren Singh-i, aluyimer ka amakba ya aitsüiogo aser ashiba agi, sorkari

aibelena alir anema jenjang tapet agitsü ta metetdaksüiogo.

Paisa Manipur nung aliba nüburttem dang yimjung aser tesunep nung alitsü merangtsü ayongzüka liasü.

Manipur nung dang kin o kin tsüngda mangatettep tulu adoker aliba mapang iba lendong ya atalokogo. Mongolbarnü kin o kin na khatapba mapang nisung ana tepset aser nisung ti tashi yiruogo.

**GOVERNMENT OF NAGALAND
DIRECTORATE OF HIGHER EDUCATION
NAGALAND: KOHIMA**

NO.HED/HOST/1/2016/

Dated: Kohima, the 31st August 2023

NOTIFICATION

This is to inform all the proprietors/wardens of the hostels registered under the Directorate of Higher Education that the hostel forms for hostellers of Post Matric Students will be issued from this Office w.e.f. 5th - 22nd Sept. 2023.

The Directorate shall also issue the Hostel Eligibility Certificate (HEC) to the newly established hostels that were inspected and found to be satisfactory.

The hostel proprietors/wardens are required to bring:

1. Original copy of Hostel Eligibility Certificate.
2. 'No Objection Certificate' from the Institutions where the hostellers are studying at the time of collecting hostel forms. NOC format can be downloaded from the given website <https://highereducation.nagaland.gov.in>.
3. Hostel admission's register with recent passport pasted against the name of the students.

**Sd/-
(Dr. A.NSHOGA)
Director
Higher Education
Nagaland: Kohima.**

Malaysia-i China indang map tasenba magizüker

Kuala Lumpur, Luroi/August 31 (Agencies): Malaysia-i 'standard map of China' tasenba magizüker, kong Malaysian Borneo tzükum anasa aliba tesem tem densema South China Sea ajunga amai kibur kuma lir.

Kanga tongtipang tzüym nungya tensa tamajungba akumer, kechiaser 2016 international court obendang kati 'nine-dash line' ta nungja agüja aliba nung kuli tejangja mangur aser 1982 United Nations Convention on the Law of the Sea (UNCLOS) ajanga melentsür ta shia liaka China-i iba tesem nung kibur akumtsü meranger.

Küm ishika China-i tenem-longren nung military outpost yanglur aser coast guard aser maritime militia tem yoker aser iba yongji khen-khen Malaysia aser Philippines densema iba tesem kibur ama jembirtem den mangatetep adoker. Vietnam, Brunei aser Taiwan linük temia iba tzüym nung kibur ama jembir.

Malaysia-i ashiba agi, 'nine-dash line' keta aliba map tasenba nungya China-i tzüym par meyong ama sayur aser Malaysia meyong Sabah aser Sarawak state tema par indang amai shia lir.

"China-i'2023 edition of the

standard map of China' nung lazüka aliba South China Sea nung kibur akumba Malaysia-i magizüker, koba Malaysian maritime area tashi lir. Iba map yagi Malaysia nung temelenshi kecha malitsü," ta foreign ministry ajanga Brehostibar nikongdang sangdong ka nung ashi.

Temeli mesükba 'nine-dash line' ya China nung puti otsü nung ajemdaker lir, koba küm 4,000 shi jakdang Xia dynasty mapang indang lir.

India-ia China indang map tasenba anema ashishitep ken o ka agütsüogo, kong India indang Arunachal Pradesh state aser Aksai Chin plateau ya China indang litsü ama sayur. Iba tesem ana ya mechi mapang talangka nungi mangatetep

adoka arur aser 2020 nunga iba mechi raratepa liasü.

"Onoki item tesem nung kibur akumba magizüker. China tsütsü nungi iba ama mera agiba ajanga mangatetep aliba arütsü indang pangzüng tali tepenjaba kumdaktsür," ta India indang foreign ministry odongtar Arindam Bagchi-i sangdong ka nung shia liasü.

India-i aitsüba indang asüngdang dang, iba map yagi ozüng nung aliba ama China tashi amshiba sayur, ta Beijing-i ashi.

"Tesem ajaklen nungi tangatetba tajung nung aser süngjema iba ken o tali tuluba mekumdaktsü alitsü imlar," ta foreign ministry odongtar Wang Wenbin-i osangbener dang Bodhbarnü ashi.

KIBUBA DANGI AOKA ANOGO



ASÜR MARMANGYANG IMSONG (UNGER)
1946 - 2022

Tanü anogo nai iba akümüli wadang toktsür orr küm ka ajungdang, onoki na kanga menungra bilemteter. Na onok den meliaka nü temeim aser sempet tajungtem onok molung nung teti lir aser iba jagi onok molung süngzüker. Tanü na menungraseta aser sarasadema onoki iba anogo amonger.

Temeim Kinungtsü, Chirnur, Semchirtem aser Anük-apang.

February ita tom tashinung general election agitsü: Pak Election Commission

Islamabad, Luroi/August 31 (Agencies): Pakistan indang election commission ajanga political party tem dang general elections ya January tatem mesüra February tiyong tashinung agitsü ta shiogo, anungji sen agi anünga aliba linük nung election tia atema tsüboa aliba ama ataloker. Awami National Party (ANP) ketdangsurtemi Election Commission of Pakistan (ECP)

ajurudang iba osang ya agütsü, ta Brehostibarnü osang ka ajanga ashi.

Chief Election Commissioner (CEC) Sikandar Sultan Raja menden sür Bodhbarnü amenba senden nung ECP ketdangsurtem dena liasü. ANP telok ya secretary general Iftikhar Hussain, central spokesman Zahid Khan, aser party lenir Khushdil Khan aser Abdul Rahim Wazir nunger temi

anir liasü.

Pakistan indang National Assembly ya August 9 nü shibang. Iba linük nung election ya National Assembly shibanger anogo 90 tsüngta agitsüla.

Pakistan Tir Arif Alvi-i election tasen ka magi tashi caretaker prime minister inyaktsü atema August ita tom nung Anwaar-ul-Haq Kakar shima liasü. Ajisüaka ECP

ajanga census tasenba nung ajemdaker delimitation tasen agitsü ang telemtetba agi, anungji general elections agitsü menudaktsü.

ANP lenirtem aser ECP tsüngta shisalemsatepba senden amendang ANP ajanga ACP dang election ya anogo 90 tsüngta magitetra election agitsü mapang aser anogo tejangja agütsütsü asüngdanga liasü.

(Maneni tapak 8 nung...)

Gabon lenir inyaktsü General Brice Oligui Nguema shimogo

Libreville, Luroi/August 31 (Agencies): Bodhbarnü Gabon sorkar atsüngdokba mitkar lenir temi linük anitsü asoshi General Brice Oligui Nguema shimogo.

Gen Nguema ya linük yimtiba Libreville yimtung nung par sepaitemi tepela agi ajunger senzüa liasü.

Tir menden nungi atsüngdoker alisang Ali Bongo ya par kidang tangokba video ka nung adoka alima nung aliba par tembar ajak dang pa tenüng nung ola adoktsü ayongzüka liasü.

Taoba mapang France kübokaliba linük ya Africa nung totzü timtiba adokba linüktem rongnung ka lir.

Bongo atsüngdokba ajanga par kibong-i Central African linük nung küm 55 tashi yimsü asüba tatem kati aru.

Bodhbarnep army officer tem TV nung adoka parnoki yimten tashi agiogo ta shia liasü.

Parnoki Honibarnü agiba election results tazüng kumtsüogo ta ashi, kong Bongo ya takoker sangdonga liasü saka opposition temi iba election ya meshidak ta shia liasü.

Army ketdangsurtemi sa linük ashioktsüba atema Bongo'er jabaso ka puogo, ta shia liasü.

Ghonda ishika tsüngta mitkar lenirtem adenshia 'transition' anitsü nübu bushi aser ajaki molungtepa taoba mapang



presidential guard tekolakba, Gen Nguema shima liasü.

Gen Nguema-i France indang Le Monde osangkaket dang ashiba agi, Gabon nüburtem Ali Bongo yimsüsa agi laktetogo aser pa kümsük tasembuba asoshi metoktepla liasü.

"Ajaki iba indang jembir saka shingaia tenüng magir. Anungji army temi iba kakat tapak melenshitsü telemtetba agi," ta pai ashi.

Libreville aser tesem balala nung aliba nüburtemi army indang sangdong pela agizüka liasü.

Ajisüaka mitkar temi sorkar atsüngdokba ya UN, African Union aser France-ibo aitsüogo, shirnok Bongo'er kibong den tesendaktep tajung lir.

US State Department-i Gabon mitkar dang civilian yimsüsüba wazüka ayutsü ajungshi aser sorkar züngsemtem pua aliba chioktsü ayongzüka liasü. UK-ia constitution nung shia aliba ama masü mitkartemi yimten tashi agiba aitsü.

Gabon nung küm 56 jungnüa yimsüba Bongo'er kibong dang mapang talangka nungi mepelaba liasü aser nüburtem kanga mepelai aru.

"Mezüngbo ni tsüboa liasü, saka tepela aru. Mitkar temi sorkar atsüngdokba tensa nung ni alir ta bilemteta ni tsübo, saka iba yimli atsüngdoktsü mapang talangka nungi ataa aruba mechi alir kati osangbener dang ashi.

Mitkar temi sorkar

atsüngdokba osang national television nung senior army officers temi asemben sangdongba mapang arishi küm 48 tain Gen Nguema meliasü.

Saka mapang talangka melie pa transitional leader asütsü sangdong aser tepela agi pa yimtung nung anir senzüa liasü.

Pa ya Ali Bongo tebo Omar Bongo indang aide-de-camp liasü, shibai küm 42 yimsü sür 2009 nung asü.

Gen Nguema ya Omar Bongo den tesendaktep tajung liasü, aser 2005 nungi Spain nung mozüki ka nung pa asünü tashi tenzüka liasü, ta tamalen Gen Nguema den külemi inyaker kati osangbener dang ashi.

Ali Bongo yimsüsüba kübok pa mezüngbo Morocco aser

Senegal nung aliba Gabon indang embassy tem nung 'military attache' ama inyaka liasü.

Ajisüaka elite republican guard kübok 2018 küm pa intelligence chief kumdaktsü - koba Gabon indang army tesashitiba unit ka liasü - shibai Ali Bongo adianu Frederic Bongo melen aser general akum.

Gabon nung taoba mapang general elections agiba ama kasa inyakyim Honibarnü agiba election nunga alitsü südi ta bilema liasü.

Opposition candidate Alberto Ondo Ossa-i polling station aika nung ballot paper tem nung pa tenüng meliasü ta ashi, aser ano tir asoshi tokteptsü tenzüka atsüngzüka orr aliba tenüng karbo ballot nung liasü, ta Ossa indang coalition ajanga ashi.

Bongo-i taoba mapang election ana nung takok anguba opposition temi magizük. Tan election agitsü hopta ishika lia mangatetep aliba voting paper agi melen.

2018 küm pa stroke süa küm ka jungnüa tir mapa meinyaktet aser iba yongji pa menden nungi alutsü khanga liasü.

Iba sülen 2019 küm mitkar temi sorkar atsüngdoktsü merangba nung tamakok ajuru aser sorkar anema nokdakba sepaitem tepuokdaki yok.

Nagaland Football Association tir-i KPC jersey sayatsü



Dimapur, Luroi/August 31 (TYO): Nagaland Football Association (NFA) tir, K Neibou Sekhose aser Head of Referees Nagaland, Kevingutuo nati August 31 nü Reiphinyü Badze, Vürrie nung Kohima Press Club jersey tasenba sayatsüogo.

Jersey sayaba sentong nung NFA tir, shiba KPC jerseys tasenba sponsor lir, pai press ya lokti tongtoret lir ta ashi. "Lokti tashitait ka asoshi press tashi tait ka nungdaker. Ni iba jersey

sponsor asüba atema kanga pelar, koba nenoki lokti aser talisa saisapong lokti asoshi mapa tajung inyaksüba atema pelaba temaitsü ka lir," ta Sekhose-i ashi.

Paisa, saisapong ajanga nüburtem longjemdaksür ta ashiba den osangbenertem südoksünemtsü asoshi mapangshia saisapong nung shilem agiba ngua kanga pelar ta ashi.

Kasa mapang nung NFA tiri

Kohima nung osangbenba lokti mapangshia ajungshiba aser nongita yariba atema KPC-i pa danga kanga pelaba lemsatepa liasü.

Morning Premier League management committee den exhibition ka asayatsü lia KPC indang jersey tasenba sayaogo. Exhibition asaya ya September 1 anepdang IG Stadium nung asayatsü, koba MPL 2023 shibangba sentong nung shilem ka asütsü.

RFEF regional tir temi Rubiales mapa nungi anentsü akhanger

Luroi/August 31, 2023 (Agencies): Hombarnü Spanish Football Federation's (RFEF)

Regional representatives temi RFEF tir Luis Rubiales-i World Cup mapang asayar Jenni Hermoso dak tebang mesepba dak sendakba nung pa mapa nungi tangsa tang anentsü takhangba agütsüogo.

FIFA Women's World Cup 2023 Final Spain team-i akokba sülen sempet agütsüba mapang Rubiales-i Hermoso dak tebang mesepba sülen mepetmesü tulu adoka liasü. Final asaya nung captain Olga Carmona-i goal ka idakja parnoki England koka liasü.

Rubiales-i Hokolbarnü pai

mapa metoktsütsü ta sangdongba mapang representatives aikati pa pusema liasü saka linük High Court prosecutor-i ken o dak sendakba nung bushisüngdang tenzüka sülen parnoki tang pa mapa nungi anentsü khangdar.

"Tawa tatalokba aser magizüktetsüsa yimya benshiba ajanga Spanish football noksa raksatsüogo aser regional tir temi Luis Rubiales tangsa tang mapa nungi anentsü akhanger," ta representatives temi ashi.

Tir temi parnok tamendakdak melenshiba ajanga Rubiales tali nongshidar, shiba FIFA-i Honibarnü suspend sütsür lir.

Arishi küm 46 tain Rubiales-i pai tebang mesepba ya tangatettep nung liasü, ta shia mapa toktsütsü memulungi arudar. Kasa mapang nung Motril nung pa tetsü par jabaso pusema telaki ka nung lumia longkak aitdar.

Hermoso, lar teammate aser Spain sorkari pai tebang meseptsü nungdak maliasü ta shiogo.

Iba tatalokba dak sendakba nung minister tem aikati Rubiales dang mapa toktsütsü shiogo.


Acting Labour Minister Yolanda Diaz-ibo tetsür aser tebur national team head coach tem mapang nungi agintsü takhangba agütsüogo.

Prithvi Shaw 2024 küma Northamptonshire nungi asayatsü

New Delhi, Luroi/August 31 (Agencies): India nunger opener Prithvi Shaw 2024 küma Northamptonshire County Cricket Club nungi maneni asayatsü. Pa taküm temekok yiruba ajanga iba club nungi mapang tatsüka dang asayateta liasü.

Domestic One-Day Cup campaign nung Shaw-i kanga junga asayaogo. Pai Somerset den asayaba mapang otsü tasen ka yanglua ball 153 nung run 244 yanglu aser iba sülen Durham den asayaba mapanga ball 76 nung out mesüi run 126 yanglua liasü.

Pa iba asayamung nung asaya pezü nung shilem agi aser average 143.00 nung run 429 yanglua kanga junga asayaogo, ajisüaka pa temekok yiruba ajanga iba asayamung tembanga masayatet.



"Ni taruba küm Northamptonshire nung tanaben oa asayatsü atema yongya atar. Taküm asayamung kanga kara tembangaka ni kanga jangradema asayaogo," ta pai ashiba club sangdong ka ajanga metetdaksü.

"Northamptonshire ya club tajung ka lir aser ni oli nungi ajaki pelashishia aizüka liasü. Ni meyipa oa asayatsü matateter. Kü nükjidongji team-i asaya akokba nung teyari agütsütsü

asoshi lir aser taküm yiruba ajanga kanga kara toktsütsüsa aküm koba kanga tezüdangtsü ka liasü," ta paisa shisem.

Shaw taruba küm NCCC-i meyipa oa asayaba mapang County Championship aser One-Day Cup naprongla nung asayatsü.

NCCC head coach John Sadler-ia, pa tanaben club-i pelashishia jaoktsü yongya ataba lemsatepogo.

"Prithvi ya sempet tajung aketba asayar ka lir aser mapang tatsüka tsüngda pai team atema kanga junga asayaogo. Pa yiruba ajanga kanga tezü danga liasü, kechiyong pa red-ball cricket kar asayanüa liasü, anungji taruba küm asayatsü asoshi maongka ngutetba ya onok ajak atema jangrademtsüka lir," ta Sadler-i ashi.

Legends League Cricket Nov 18 nungi Dec 9 tashi asayatsü

New Delhi, Luroi/August 31 (Agencies): Tanabuba Legends League Cricket (LLC) ayongertemi Brehostibarnü sangdong ka ajanga ashiba agi, taküm iba asayamung ya India nung November 18 nungi December 9 tashi asayatsü.

Mezüngbuba LLC ya taoba küm October ita tembanga liasü, koba India Capitals-i kokogo.

"Taruba Legends League Cricket franchise season ya jangrademtsüka asütsü, kong iba asaya legend tem India-i aru asayamung nung shilem agitsü," ta asayamung ayongertemi ashi.

Legends League Cricket tanabuba season ya tesem tasen kar nung ayongzüka asayatsü asoshi asayamung ayongertem sentong lir.

Temetetsü kaji mezüngbuba LLC asayamung nung Suresh

Raina, Aaron Finch, Hashim Amla, Ross Taylor aser Chris Gayle nunger amala nungtugu asayartemi shilem agiba nguogo.

Kasa mapang nung LLC commissioner Ravi Shastri-i iba asayamung ayongzüka asayatsü yongya ataba lemsatepogo.

"Onok iba asayamung atema renema lir. World-class competitive cricket ya maneni jangrademtsüka lir. Nungtugu asayar tejentem aika bendenlokba sülen asayaba moapu nung jangradatema akümtsü," ta pai ashi.

"Onoki iba asayamung ajanga iba category nung and cricketing fraternity aser fan tem atema tajangshiba tajungtiba ka agütsütsü imlar. Iba league renloka aoba ajangshia arudar aser season ka nung season ka ta tajungba küma odar," ta paisa shisem.

Benjamin Pavard Inter Milen nung denogo



Luroi/August 31, 2023

(Agencies): Inter Milan-i Bayern Munich nungi France nunger defender Benjamin Pavard alizükogo, ta club anaprongla yagi Bodhbarnü sangdong ka ajanga metetdaksü.

Pa alizükba dak sendakba nung senotsü osang tejangja magütsü, ajisüaka Italy nung media sangdong balala ajanga ashiba agi, arishi küm 27 tain asayar ya Simone Inzaghi-i aniba telok nung ya euro million 32 shi yong denogo. Pa den küm pongu atema

tenangzüktepba yangluogo.

Pavard-i France team nungi asayaba mapang 2018 küm Russia nung World Cup dena koker lir.

Inter pur Serie A season tasenba kanga junga tenzüko aser mezüngbuba asaya anaprongla kokogo. Ajisüaka Inzaghi-i ashiba agi, Milan Skriniar Paris St Germain-i aoba sülen team nung tajangshiba aika aliba defender ka nungdaker.

Inter pur Deobarnü Serie A nung Fiorentina den asayatsü lir.

February ita tom tashinung... (Tapak 7 nungi...)

Anogo ka tejakdang Pakistan People's Party (PPP)-ia election atema kasa takhangba agüja liasü. ECP den ajurutepba sülen Hussain-ia February tiyonglen election agitsü parnok renema aliba shiogo aser tekeraba nung election agitsü mechi parnoki meranga inyakba metetdaksü, ta ashi.

Election Commission ketdangsur temi ANP lenirtem dang delimitation mapang akok tashi tatsüba agitsü aser election ya January ita tatem tashinung

agitsü merangtsü ta ashi.

Tang sangdonga aliba delimitation sentong ya anogo 120 (December 14) ashinung tembangtsü, ta Election Commission ajanga ashi.

Ajisüaka ANP-i ashiba agi, ECP yagi delimitation sentong mesangdong tsüngta political party tem den asüngdangya asütsüla asü.

ECP yagi Balochistan Awami Party (BAP) aser Balochistan National Party (BNP) den Bodhbarnü shisadokden senden mena liasü.

BILEMDANGANG
"Nükjidong tasen ayutsü atema kecha temonu mali."